

არასამეწარმეო (არაკომერციული) იურიდიული პირის

„ქუთაისის ოლიმპიური საცურაო აუზი“-ს

წესდება

**მუხლი 1. ზოგადი დებულებები**

1. არასამეწარმეო (არაკომერციული) იურიდიული პირი „ქუთაისის ოლიმპიური საცურაო აუზი“ არის საქართველოს სამოქალაქო კოდექსის შესაბამისად შექმნილი იურიდიული პირი (შემდგომ - ორგანიზაცია), რომელიც მოქმედებს საქართველოს კონსტიტუციის, კანონმდებლობისა და ამ წესდების შესაბამისად.
2. ეს წესდება წარმოადგენს ორგანიზაციის დამფუძნებელთა შორის დადებული სადამფუძნებლო შეთანხმების ნაწილს, რომელიც გამოხატავს მათ ურთიერთთანხმებულ ნებას და სავალდებულო ძალის მქონეა დამფუძნებლებისთვის.
3. ორგანიზაცია წარმოშობილად ითვლება და იურიდიული პირის სტატუსს იძენს მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის მომენტიდან.
4. ორგანიზაცია თავისი ხელმძღვანელობისა და წარმომადგენლობითი უფლებამოსილების მქონე პირის (პირების) მდგომარეობისაგან დამოუკიდებელია. ორგანიზაციის პასუხისმგებლობა კრედიტორების წინაშე შემოიფარგლება მთელი თავისი ქონებით.
5. ორგანიზაციის ვალდებულებებისათვის მისი დამფუძნებელი, ხელმძღვანელობასა და წარმომადგენლობაზე უფლებამოსილი პირი (პირები) პასუხს არ აგებს.
6. ორგანიზაცია პასუხს არ აგებს თავისი დამფუძნებლების, ხელმძღვანელობასა და წარმომადგენლობაზე უფლებამოსილი პირის (პირების) ვალდებულებებისთვის.
7. ორგანიზაციის მიზანია არასამეწარმეო (არაკომერციული) საქმიანობა, ამავდროულად ის უფლებამოსილია ეწეოდეს დამხმარე ხასიათის სამეწარმეო საქმიანობას, რომლიდან მიღებული მოგებაც უნდა მოხმარდეს მისი მიზნების რეალიზებას. ასეთი საქმიანობის შედეგად მიღებული მოგების განაწილება ორგანიზაციის დამფუძნებლებს, შემომწირველებს, აგრეთვე, ხელმძღვანელობასა და წარმომადგენლობაზე უფლებამოსილ პირებს შორის დაუშვებელია. ორგანიზაცია უფლებამოსილია მისი საქმიანობის განსახორციელებლად შეიძინოს/მიიღოს მატერიალური და არამატერიალური ქონება, მათ შორის, შემოწირულობები.
8. ორგანიზაციის საკუთრებაში არსებული ქონების გასხვისება შესაძლებელია, თუ გასხვისება ემსახურება ორგანიზაციის საქმიანობას, მის ორგანიზაციულ განვითარებას, ხელს უწყობს მისი მიზნების განხორციელებას ან ემსახურება საქველმოქმედო მიზნებს.
9. ორგანიზაციას თავისი მიზნების მისაღწევად უფლება აქვს განახორციელოს კანონით აუკრძალავი ნებისმიერი საქმიანობა, მიუხედავად იმისა, არის თუ არა ეს საქმიანობა წინამდებარე წესდებით გათვალისწინებული.
10. ორგანიზაციის მიმართ ვრცელდება „მეწარმეთა შესახებ“ საქართველოს კანონის მე-17 მუხლით საქმიანი წერილისა და ვებგვერდისთვის დადგენილი წესები.

## მუხლი 2. ორგანიზაციის მიზნები და ამოცანები

1. ორგანიზაციის მიზნებია:
  - ა/. ქალაქ ქუთაისში ცურვისა და წყალბურთის პოპულარიზაცია, განვითარება და მოზარდ თაობაში ჯანსაღი ცხოვრების წესის პროპაგანდა. სპორტის ამ სახეობებში მაღალკვალიფიციური სპორტსმენების მომზადების სისტემის სრულყოფა;
  - ბ/. ცურვისა და წყალბურთის სექციების ჩამოყალიბება;
  - გ/. სპორტის ამ სახეობებში ქალაქის ნაკრები გუნდების ჩამოყალიბება, საქართველოს ჩემპიონატებში, პირველობებში და საელაშორისო შეჯიბრებებში სპორტსმენებისა და ქალაქის ნაკრები გუნდების მონაწილეობის ხელშეწყობა და უზრუნველყოფა.
2. ორგანიზაციის ამოცანებია:
  - ა/. ორგანიზება გაუწიოს სპორტულ-გამაჯანსაღებელ პროცესს;
  - ბ/. უზრუნველყოს ცურვისა და წყალბურთის პოპულარიზაცია და კვალიფიციური სწავლება;
  - გ/. ჩაატაროს შეჯიბრებები, ოლიმპიადები და იზრუნოს ნიჭიერი ახალგაზრდების გამოვლენაზე;
  - დ/. განახორციელოს საქართველოს კანონმდებლობითა და ამ წესდებით გათვალისწინებული სხვა უფლებამოსილება.

## მუხლი 3. დამფუძნებელთა მიერ ორგანიზაციის მართვა

1. ორგანიზაციის დამფუძნებელია ქალაქ ქუთაისის მუნიციპალიტეტი.
2. ორგანიზაციის დამფუძნებლის უფლებამოსილებას ერთპიროვნულად ახორციელებს ქალაქ ქუთაისის მუნიციპალიტეტის მერი.
3. დამფუძნებლის უფლებამოსილების ფარგლებში, ქალაქ ქუთაისის მუნიციპალიტეტის მერის მიერ მიღებული გადაწყვეტილება ფორმდება წერილობით, ინდივიდუალურ ადმინისტრაციულ სამართლებრივი აქტის - ბრძანების სახით.
4. ორგანიზაციის უმაღლეს მმართველობით ორგანოს წარმოადგენს დამფუძნებელი, რომელიც წელიწადში ერთხელ მაინც, განიხილავს წლიურ შედეგებს და დღის წესრიგით გათვალისწინებულ სხვა საკითხებს.
5. დამფუძნებლის კომპეტენციას განეკუთვნება შემდეგი საკითხები:
  - ა/. ორგანიზაციის მიზნებიდან გამომდინარე, ორგანიზაციის საქმიანობის შესახებ გადაწყვეტილების მიღება;
  - ბ/. ორგანიზაციის მიერ ვალდებულების აღება, ქონების შეძენა/გასხვისება/უფლებრივად დატვირთვა;
  - გ/. ორგანიზაციის გაწევრიანება სხვა იურიდიულ პირებში ან მისი პარტნიორად/დამფუძნებლად შესვლა;
  - დ/. ორგანიზაციის წესდებაში ცვლილება/წესდების ახალი რედაქციის მიღება, შინაგანაწესის დამტკიცება;
  - ე/. ორგანიზაციის ხელმძღვანელობაზე/წარმომადგენლობაზე უფლებამოსილი პირის დანიშვნა;

ვ/. ორგანიზაციის და მის მიერ დაფუძნებული იურიდიული პირების რეორგანიზაცია/ლიკვიდაცია კანონით დადგენილი წესით.

6. ორგანიზაციას მხოლოდ დამფუძნებლის, ქალაქ ქუთაისის მუნიციპალიტეტის მერის თანხმობით, შეუძლია განახორციელოს შემდეგი საქმიანობა:

ა/. უძრავი ქონების შეძენა, გასხვისება და დატვირთვა;

ბ/. სესხის აღება;

გ/. თავდებობა;

დ/. ორგანიზაციის საშტატო ნუსხის, საშტატო განრიგის, სახელფასო ფონდის, პრემიების, ჯილდოებისა და ფინანსური დახმარების, ასევე შესაძენი საწვავისა და გასაწევი საკომუნიკაციო ხარჯების ლიმიტების განსაზღვრა/გაცემა;

ე/. სხვა გადაწყვეტილებები ორგანიზაციის ქონებასთან დაკავშირებით, თუ ისინი სცილდება ჩვეულებრივი საქმიანობის ფარგლებს.

#### **მუხლი 4. ორგანიზაციის ხელმძღვანელობა/წარმომადგენლობა**

1. ორგანიზაციის ხელმძღვანელობასა და წარმომადგენლობაზე უფლებამოსილი პირია დირექტორი, რომელსაც ნიშნავს დამფუძნებელი - ქალაქ ქუთაისის მუნიციპალიტეტის მერი.

2. დამფუძნებელი - ქალაქ ქუთაისის მუნიციპალიტეტის მერი ორგანიზაციის დირექტორის დანიშვნის თაობაზე გამოსცემს ინდივიდუალურ ადმინისტრაციულ სამართლებრივ აქტს - ბრძანებას.

3. ხელმძღვანელობითი უფლებამოსილება გულისხმობს უფლებამოსილების ფარგლებში ორგანიზაციის სახელით გადაწყვეტილებების მიღებას. დირექტორი თავის ხელმძღვანელობით უფლებამოსილებას ახორციელებს მოქმედი კანონმდებლობის, ამ წესდებისა და შინაგანაწესის (ასეთის არსებობის შემთხვევაში) შესაბამისად.

4. წარმომადგენლობითი უფლებამოსილება გულისხმობს ორგანიზაციის სახელით გამოსვლას მესამე პირებთან ურთიერთობაში. დირექტორს აქვს ერთპიროვნული წარმომადგენლობითი უფლებამოსილება. ამასთან, თუ ორგანიზაციას ერთზე მეტი დირექტორი ჰყავს, ისინი წარმომადგენლობით უფლებამოსილებას ახორციელებენ სადამფუძნებლო შეთანხმებით განსაზღვრული წესის შესაბამისად.

5. უფლებამოსილების ფარგლებში დირექტორს აქვს უფლება ორგანიზაციის სახელით დადოს გარიგებები, აწარმოოს მოლაპარაკებები, გამოვიდეს სასამართლოში მოსარჩელედ/მოპასუხედ, მიიღოს ორგანიზაციაში თანამშრომლები, გააფორმოს მათთან ხელშეკრულება და გადაწყვიტოს საკადრო საკითხები. დირექტორი უფლებამოსილია განახორციელოს მხოლოდ ის მოქმედება, რომელიც ემსახურება ორგანიზაციის მიზნებს და არ აყენებს მას ზიანს. იგი ვალდებულია ორგანიზაციის საქმეებს გაუძღვეს მართლზომიერად და კეთილსინდისიერად. ამ მოვალეობის შეუსრულებლობის შემთხვევაში, დირექტორი არასამეწარმეო (არაკომერციული) იურიდიული პირის წინაშე პასუხისმგებელია წარმომადგენლობითი ზიანისათვის. ზიანის ანაზღაურების მოთხოვნაზე უარის თქმა ბათილია, თუ ეს აუცილებელია მესამე პირთა მოთხოვნების დასაკმაყოფილებლად. დირექტორის ხელმძღვანელობითი უფლებამოსილება შეიძლება შეიზღუდოს სადამფუძნებლო შეთანხმებით.

6. დამფუძნებელს - ქალაქ ქუთაისის მუნიციპალიტეტის მერს შეუძლია ნებისმიერ დროს გაათავისუფლოს დირექტორი თანამდებობიდან შესაბამისი საფუძვლის მითითების გარეშე.

7. დირექტორს უფლება აქვს გადადგეს თანამდებობიდან. ამ შემთხვევაში, დირექტორი ვალდებულია დაიცვას ორგანიზაციასთან დადებული სასამსახურო ხელშეკრულებითა და მოქმედი კანონმდებლობით განსაზღვრული მოთხოვნები და პროცედურები.

8. დირექტორი ვალდებულია წელიწადში ერთხელ დამფუძნებელს - ქალაქ ქუთაისის მუნიციპალიტეტის მერს წარუდგინოს ორგანიზაციის საქმიანობის ანგარიში.

### **მუხლი 5. ორგანიზაციის ქონება, ფინანსები და ანგარიშები**

1. დაკისრებული ფუნქციების განსახორციელებლად ორგანიზაციას ქალაქ ქუთაისის მუნიციპალიტეტის მიერ გადაეცემა შესაბამისი ქონება საქართველოს კანონმდებლობით დადგენილი წესით.

2. ორგანიზაციის დაფინანსების წყაროებია:

ა/. ადგილობრივი ბიუჯეტიდან გამოყოფილი სახსრები, შემოწირულობა, გრანტები. საქართველოს კანონმდებლობით ნებადართული შემოსავლები;

ბ/. ფასიანი სწავლებიდან მიღებული შემოსავალი;

გ/. სახელმწიფო დაწესებულებებიდან მიღებული შემოსავალი;

დ/. ხელშეკრულების საფუძველზე შესრულებული სამუშაოდან მიღებული შემოსავალი;

ე/. დამხმარე სამეწარმეო საქმიანობიდან მიღებული შემოსავალი.

3. მიღებული შემოსავლები საქართველოს კანონმდებლობიდან გამომდინარე ხმარდება ორგანიზაციის იზნებისა და ამოცანების განხორციელებას და სხვა დანიშნულებით გამოყენება დაუშვებელია.

4. ორგანიზაცია საქართველოს კანონმდებლობით დადგენილი წესით ვალდებულია აწარმოოს საფინანსო-ეკონომიკური საქმიანობის აღრიცხვა-ანგარიშგება. შეადგინოს ბალანსი და წარუდგინოს ქალაქ ქუთაისის მუნიციპალიტეტის მერს

### **მუხლი 6. ორგანიზაციის სამართლებრივი ფორმის შეცვლა, რეორგანიზაცია, შერწყმა და ლიკვიდაცია**

1. ორგანიზაციის სამართლებრივი ფორმის შეცვლა დაუშვებელია, გარდა იმ შემთხვევისა, როდესაც სამართლებრივი ფორმის შეცვლით იგი საჯარო სამართლის იურიდიულ პირად გარდაიქმნება.

2. ორგანიზაციის გაყოფა (დაყოფა, გამოყოფა), შერწყმა (გაერთიანება, მიერთება) და ლიკვიდაცია ხორციელდება მეწარმე სუბიექტის ლიკვიდაციისათვის/რეორგანიზაციისათვის საქართველოს კანონმდებლობით დადგენილი წესით.

3. ორგანიზაციის რეორგანიზაციისა და ლიკვიდაციის, ასევე, ლიკვიდატორის დანიშვნის შესახებ გადაწყვეტილებას იღებს დამფუძნებელი/დამფუძნებელთა საერთო კრება.

4. ლიკვიდაციის დროს უნდა დასრულდეს მიმდინარე საქმეები, დადგინდეს კრედიტორთა მოთხოვნები, დარჩენილი ქონება გამოიხატოს ფულში, დაკმაყოფილდნენ კრედიტორები და დარჩენილი ქონება გაუნაწილდეს დამფუძნებლის/დამფუძნებელთა საერთო კრების მიერ განსაზღვრულ ლიკვიდაციის შედეგად დარჩენილი ქონების მიღებაზე უფლებამოსილ პირებს.

5. გადაწყვეტილება ორგანიზაციის ლიკვიდაციის პროცესის დაწყების შესახებ უნდა დარეგისტრირდეს მეწარმეთა და არასამეწარმეო (არაკომერციული) იურიდიული პირების რეესტრში. ლიკვიდაციის პროცესი დაწყებულად ითვლება ორგანიზაციის ლიკვიდაციის დაწყების შესახებ ინფორმაციის რეესტრში რეგისტრაციის მომენტიდან.

6. ლიკვიდაციის შედეგად დარჩენილი ქონების მიღებაზე უფლებამოსილ პირებს განსაზღვრავს საერთო კრება. ორგანიზაციის ლიკვიდაციისას ქონების გასხვისება შესაძლებელია, თუ:

ა) იგი ხელს შეუწყობს მის მიერ დასახული მიზნების განხორციელებას;

ბ) იგი ემსახურება საქველმოქმედო მიზნებს;

გ) ქონება გადაეცემა სხვა არასამეწარმეო (არაკომერციულ) იურიდიულ პირს.

7. აკრძალულია ლიკვიდაციის შედეგად დარჩენილი ქონების განაწილება დამფუძნებლებს, ხელმძღვანელობასა და წარმომადგენლობაზე უფლებამოსილ პირებს შორის.

8. თუ დამფუძნებელმა/დამფუძნებელთა საერთო კრებამ არ განსაზღვრა ლიკვიდაციის შედეგად დარჩენილი ქონების მიღებაზე უფლებამოსილი პირი, სასამართლო ორგანიზაციის ლიკვიდაციის შედეგად დარჩენილ ქონებას გადასცემს შესაბამისად ერთ ან რამდენიმე არასამეწარმეო (არაკომერციულ) იურიდიულ პირს, რომლებსაც აქვთ იგივე ან მსგავსი მიზნები, როგორც ლიკვიდირებულ ორგანიზაციას. თუ ასეთი არასამეწარმეო (არაკომერციული) იურიდიული პირი არ არსებობს ან შეუძლებელია მისი გამოვლენა, შეიძლება მიღებულ იქნეს გადაწყვეტილება ამ ქონების სახელმწიფოსათვის გადაცემის შესახებ. სასამართლომ ქონება შეიძლება გაანაწილოს ლიკვიდაციის პროცესის დაწყების რეგისტრაციიდან 6 თვის შემდეგ.

9. სისხლის სამართლის საქმეზე კანონიერ ძალაში შესული სასამართლოს გამამტყუნებელი განაჩენის საფუძველზე ორგანიზაციის ლიკვიდაციას ახორციელებს (ახორციელებენ) სასამართლოს მიერ დანიშნული ლიკვიდატორი (ლიკვიდატორები). აკრძალულია ორგანიზაციის მიმართ სალიკვიდაციო და რეორგანიზაციასთან დაკავშირებული პროცედურების განხორციელება მის მიმართ სისხლის სამართლის საქმის წარმოების დაწყების მომენტიდან სასამართლოს გამამტყუნებელი განაჩენის კანონიერ ძალაში შესვლამდე ან სისხლის სამართლის საქმის წარმოების შეწყვეტამდე.

## მუხლი 7. დასკვნითი დებულებები

1. ამ წესდების რომელიმე დებულების ბათილად ცნობა გავლენას არ მოახდენს წესდების სხვა დებულებების ნამდვილობაზე.

ქალაქ ქუთაისის მუნიციპალიტეტის მერი

იოსებ ხახალეიშვილი